



AZIMIO NA. 05/2017

AZIMIO LA BUNGE LA KURIDHIA ITIFAKI YA UDHIBITI WA UCHAFUZI WA MAZINGIRA YA BAHARI NA UKANDA WA PWANI YA MAGHARIBI YA BAHARI YA HINDI KUTONAKANA NA VYANZO NA SHUGHULI ZINAZOFANYIKA NCHI KAVU (*PROTOCOL FOR THE PROTECTION OF THE MARINE AND COASTAL ENVIRONMENT OF THE WESTERN INDIAN OCEAN FROM LAND-BASED SOURCES AND ACTIVITIES*)

KWA KUWA, Itifaki ya Udhubiti wa Uchafuzi wa Mazingira ya Bahari na Ukanda wa Pwani ya Magharibi ya Bahari ya Hindi Kutokana na Vyanzo na Shughuli zinazofanyika Nchi Kavuu ilipitishwa na kusainiwa na Nchi husika tarehe 1 Aprili, 2010 Nairobi, Kenya;

NA KWA KUWA, Madhumuni ya Itifaki hii ni kudhibiti uchafuzi na uharibifu wa Mazingira ya Bahari na Ukanda wa Pwani ya Magharibi ya Bahari ya Hindi unaotokana na vyanzo na shughuli za kibinadamu zinazofanyika nchi kavu;

NA KWA KUWA, Nchi Wanachama zinazohusika na Itifaki hii ni zile zinazopakana na Bahari ya Hindi ambazo zinajumuisha Komoro, Kenya, Somalia, Madagascar, Mauritius, Msumbiji, Shelisheli, Re-Unioni, Jamhuri ya Afrika Kusini na Jamhuri ya Muungano wa Tanzania;

NA KWA KUWA, Itifaki hii imeanzishwa chini ya Mkataba wa Nairobi uliofanyiwa marekebisho na Nchi Wanachama Mwaka, 2010 (Mkataba wa Nairobi wa Hifadhi, Usimamizi na Uendelezaji wa Mazingira ya Bahari na Ukanda wa Pwani ya Magharibi ya Bahari ya Hindi – (*Amended Convention for the Protection, Management and*

Development of the Marine and Coastal Environment of the Western Indian Ocean) na Tanzania ilipitisha na kusaini marekebisho hayo tarehe 1 Aprili, 2010;

NA KWA KUWA, katika utekelezaji wa Mkataba wa Nairobi unaohusu Hifadhi, Usimamizi na Uendelezaji wa Mazingira ya Bahari na Pwani ya Kanda ya Mashariki, ambao Tanzania iliuridhia tarehe 1 Machi, 1996, zipo changamoto za mazingira zilizojitokeza ambazo zilisababisha Nchi Wanachama kuazimia Mkataba huo urekebishwe;

NA KWA KUWA, makubaliano ya kuupitia Mkataba wa Nairobi yalifikiwa katika Mkutano wa Pili wa Nchi Wanachama uliofanyika Port Luis, Mauritius Mwaka 1999;

NA KWA KUWA, mapitio ya Mkataba huo yalibainisha changamoto mbalimbali zikiwemo uchafuzi wa Mazingira ya Bahari na Ukanda wa Pwani toka vyanzo na shughuli zinazofanyika nchi kavu, uharibifu wa maeneo ya Pwani, utupwaji wa taka zenye kemikali za sumu baharini na athari za mabadiliko ya tabianchi;

NA KWA KUWA, katika kukabiliana na changamoto zilizojitokeza hususan uchafuzi wa Mazingira ya Bahari na Ukanda wa Pwani toka vyanzo na shughuli zinazofanyika nchi kavu na kwa kuzingatia Ibara ya 4 Aya ya 2 ya Mkataba wa Nairobi ambayo inazipa mamlaka Nchi Wanachama kuanzishwa Itifaki mbalimbali ili kutekeleza Mkataba huo, Nchi Wanachama zilikubaliana kuanzishwa kwa Itifaki inayopendekwa kuridhiwa;

NA KWA KUWA, Tanzania kwa kuweka saina Itifaki hii na hatimaye kuitekeleza itanufaika na mambo yafuatayo:

- (a) kuhifadhi na kuongezeka kwa bioanuai, kuboresha mazingira ya bahari na Ukanda wa Pwani ya Magharibi ya Bahari ya Hindi, kupitia utekelezaji wa mipango ya kudhibiti uchafuzi unaotokana na shughuli zinazofanyika nchi kavu;
- (b) kuongezeka kwa ubora wa maji kwenye mito na bahari kutokana na udhibiti wa uchafuzi;

- (c) kuongezeka kwa kipato cha jamii za Ukanda wa Pwani kutokana na kuongezeka kwa mazao ya bahari na Ukanda wa Pwani;
- (d) kuimarika kwa afya za wananchi kwa kuwa na mazingira bora;
- (e) kuimarika kwa ushirikiano baina ya Tanzania na Nchi Wanachama kutokana na kuongezeka kwa hatua za kulinda mazingira ya Pwani na bahari;
- (f) kuimarisha ushirikiano katika masuala ya kitaalamna kujenga uwezo katika masuala ya sayansi na teknolojia zinazohusu udhibiti wa uchafuzi unaotokana na shughuli zinazofanyika nchi kavu na kushirikiana katika kutekeleza program za kujenga uwezo kwa Nchi Wanachama;
- (g) kutoa elimu kwa umma na ushirikishwaji wa jamii kwa kuhamasisha upatikanaji wa taarifa na nyaraka muhimu zinazohusu uchafuzi wa bahari toka nchi kavu; na
- (h) upatikanaji wa fursa za utekelezaji wa program na miradi kwa ushirikiano na nchi nyingine, inayolenga kudhibiti uchafuzi wa mazingira ya bahari na Ukanda wa Pwani ya Magharibi ya Bahari ya Hindi.

KWA HIYO BASI, kwa kuzingatia umuhimu na manufaa ya Itifaki hii kwa Tanzania, Bunge katika Mkutano wa Saba na kwa mujibu wa Ibara ya 63(3)(e) ya Katiba ya Jamhuri ya Muungano wa Tanzania ya mwaka, 1977, linaazimia kuridhia Itifaki ya Udhibiti wa Uchafuzi wa Mazingira ya Bahari na Ukanda wa Pwani ya Magharibi ya Bahari ya Hindi Kutokana na Vyanzo na Shughuli Zinazofanyika Nchi Kavu, yaani *"the Protocol for the Protection of the Marine and Coastal Environment of the Wester Indian Ocean from Land – Based Sources and Activities"*.

Limepitishwa na Bunge leo tarehe 29 Juni, 2017

Dkt. Thomas D. Kasilillah
KATIBU WA BUNGE